

## Canllawiau ar gyfer Gwasanaethau Dechrau'n Deg a Theuluoedd yn Gyntaf – COVID-19

### At: Cyfarwyddwyr Addysg, Cyfarwyddwyr Gwasanaethau Plant, Penaethiaid Gwasanaethau Teuluoedd yn Gyntaf, Penaethiaid Gwasanaethau Dechrau'n Deg ac Arweinwyr y Grant Plant a Chymunedau.

Mae'r coronafeirws newydd (COVID-19) yn cyflwyno heriau heb eu tebyg o'r blaen i'n teuluoedd a'n gwasanaethau. Diolch ichi am eich gwaith caled a'ch proffesiynoldeb yn ystod y cyfnod heriol hwn.

Mae'r ddogfen hon yn cynnig canllawiau ar ddarparu gwasanaethau Dechrau'n Deg a Theuluoedd yn Gyntaf yn ystod y cyfnod hwn. Rydym am ichi eu rhannu ymhlith eich timau a rhoi sicrwydd ein bod yn gweithio'n galed i sicrhau ein bod yn cynnig canllawiau i'ch cefnogi wrth ddarparu gwasanaethau i blant a theuluoedd ar hyn o bryd ac wrth i'r sefyllfa ddatblygu.

Rydym yn cydnabod y bydd teuluoedd o dan bwysau emosiynol, ariannol a seicolegol ychwanegol yn ystod y cyfnod hwn. Er diogelwch a llesiant eich staff a'r plant a'r teuluoedd yr ydych yn eu cefnogi, mae hefyd yn hanfodol bod gwasanaethau'n cael eu cyflwyno mewn ffordd sy'n gyson â'r cyngor gwyddonol arbenigol a ddarperir gan Lywodraeth Cymru<sup>1</sup>. Gallai'r cyngor gwyddonol hwnnw, a'r canllawiau yn sgil hynny, newid.

Bydd angen ichi sicrhau hefyd fod gwasanaethau'r rhaglenni'n cydymffurfio â Rheoliadau Diogelu Iechyd (Coronafeirws) (Cymru) 2020. Ceir canllawiau ymarferol ar sut i weithredu'n unol â'r rheoliadau hyn yn y gweithle [yma](#).

Dylid anfon pob ymholiad ynglŷn â'r canllawiau hyn at y blwch negeseuon e-bost perthnasol:

[familiesfirst@llyw.cymru](mailto:familiesfirst@llyw.cymru)

[FlyingStart2@llyw.cymru](mailto:FlyingStart2@llyw.cymru)

### Y gynulleidfa darged

Dylai'r canllawiau hyn gael eu defnyddio gan y rhai hynny sy'n ymwneud â chynllunio, comisiynu a chyflwyno'r gwasanaethau a ariennir drwy naill ai rhaglen Dechrau'n Deg neu raglen Teuluoedd yn Gyntaf, gan gynnwys Cydgysylltwyr Dechrau'n Deg a Theuluoedd yn Gyntaf, arweinwyr gwasanaethau awdurdodau lleol a phartneriaid cyflenwi ar draws yr holl sectorau perthnasol.

Nodau'r canllawiau yw:

- Annog ffordd hyblyg ac ymarferol o gynnal gwasanaethau Dechrau'n Deg a Theuluoedd yn Gyntaf yn ystod pandemig y coronafeirws newydd.

---

<sup>1</sup> <https://llyw.cymru/coronafeirws-cadw-pellter-cymdeithasol>

- Sicrhau bod gwasanaethau Dechrau'n Deg a Theuluoedd yn Gyntaf yn hyblyg ac yn berthnasol i anghenion penodol y boblogaeth a'r gymuned lleol.
- Galluogi rhaglenni Dechrau'n Deg a Theuluoedd yn Gyntaf, hyd y gellir, i barhau i chwarae rhan wrth gefnogi plant a'u teuluoedd yn ystod cyfnod y pandemig.
- Galluogi gwasanaethau Dechrau'n Deg a Theuluoedd yn Gyntaf i ymdopi'n briodol â'r pwysau ychwanegol y gallai'r coronafeirws newydd ei roi ar ddarparu gwasanaethau.
- Hybu gweithio mewn partneriaeth ar draws yr holl wasanaethau sy'n cefnogi teuluoedd.

Mae'r newidiadau hyn yn fesur dros dro mewn ymateb i'r amgylchiadau digyffelyb hyn yr ydym yn eu hwynebu ar hyn o bryd. Roedd y newidiadau ar waith am dri mis yn y lle cyntaf o 27 Mawrth ymlaen, ac maent wedi cael eu hadolygu yng ngoleuni cyhoeddiadau ynghylch gweithrediad ysgolion a gofal plant. Bydd y canllawiau hyn yn cael eu hadolygu ymhellach wrth i benderfyniadau yn ymwneud â'r coronafeirws gael eu gwneud dros yr wythnosau a'r misoedd nesaf. Rydym yn disgwyl i raglenni Dechrau'n Deg a Theuluoedd yn Gyntaf fynd yn ôl at gyflawni rhaglen lawn o weithgareddau pan fydd y trefniadau arferol yn ôl yn eu lle.

Yn ystod cyfnod yr amhariad ar wasanaethau, nodwch y bydd Llywodraeth Cymru yn cymryd hynny i ystyriaeth wrth adolygu perfformiad yn erbyn y lefelau perfformiad y cytunwyd arnynt mewn perthynas â llwythi gwaith a Dull Rhaglen Ofal. Mae'r gwasanaethau hynny'n parhau i fod yn hanfodol i deuluoedd ar draws Cymru. Felly, rydym yn disgwyl i bawb wneud eu gorau glas i gyrraedd cynifer o deuluoedd ag sy'n bosibl mewn modd priodol yn ystod y cyfnod hwn. Bydd canllawiau ar ofynion y grant yn dilyn maes o law.

## **Canllawiau Dechrau'n Deg**

Rydym yn cydnabod y bydd teuluoedd yn dioddef straen ychwanegol ac yn wynebu heriau unigryw yn ystod y cyfnod anodd hwn. Rydym yn cydnabod efallai na fydd yn bosibl ddarparu holl wasanaethau Dechrau'n Deg drwy'r trefniadau arferol yng ngoleuni'r cyngor gwyddonol presennol gan lechyd Cyhoeddus Cymru. Nod y canllawiau hyn yw cynnig gwybodaeth glir am fframwaith gwasanaethau Dechrau'n Deg y gellir eu darparu i gefnogi plant a theuluoedd mewn angen, yn unol â'r cyngor gwyddonol presennol mewn perthynas â chyfyngu lledaeniad y feirws.

Rhoddir arweiniad ynghylch darparu cymorth wyneb yn wyneb yn Atodiad 1.

Caiff y canllawiau eu cyfleu yn ôl thema o dan bedair elfen graidd Dechrau'n Deg:

### **Gwasanaethau Ychwanegol Ymwelwyr Iechyd Dechrau'n Deg**

I gydnabod y pwysau ychwanegol ar wasanaethau ymwelwyr iechyd, dylai Ymwelwyr Iechyd Dechrau'n Deg, a'r gweithlu iechyd ehangach (cymysgedd o sgiliau) gydymffurfio â'r Canllawiau ar gyfer Ymwelwyr Iechyd Dechrau'n Deg ac Ymwelwyr Iechyd Generig sydd newydd eu cyhoeddi ac a ddarperir isod:



Guidance for Flying  
Start and Generic H

Dylai gweithwyr iechyd proffesiynol roi sylw penodol i egwyddor 4 sy'n ymwneud â rheoli diogelwch ac achosion ar sail anghenion uchel, sydd yn ôl y dystiolaeth yn fwy cyffredin yn ardaloedd Dechrau'n Deg.

Mae'n hanfodol bod Dechrau'n Deg a gwasanaethau iechyd generig yn blaenoriaethu eu hadnoddau er mwyn sicrhau bod teuluoedd yn derbyn y cymorth sydd ei angen arnynt, ar yr adeg y mae ei angen arnynt, yn ystod y cyfnod heriol hwn. Anogir timau iechyd Dechrau'n Deg i weithio ar y cyd â thimau iechyd generig i ddarparu gwasanaeth di-dor yn ystod y pandemig.

### **Gwasanaethau Rhianta Dechrau'n Deg**

O ystyried y cyngor gwyddonol presennol sy'n ymwneud â phwysigrwydd cadw pellter cymdeithasol, bydd rhaid i Awdurdodau Lleol addasu'r ffordd y mae gwasanaethau rhianta Dechrau'n Deg yn cael eu darparu. Ceir cyngor ar ddarparu cymorth wyneb yn wyneb yn Atodiad 1. Er mwyn bodloni'r galw parhaol a newidiol am gymorth, disgwylir i Awdurdodau Lleol edrych ar ffyrdd arloesol eraill o gyrraedd plant a rhieni. Dylent flaenoriaethu rhaglenni rhianta ar-lein sy'n agored i bawb a darpariaethau wedi'u targedu, sy'n fwy addas ar lefel un-i-un, gan sicrhau bod y cyngor ynghylch cadw pellter cymdeithasol yn cael ei ddilyn. Dylai awdurdodau lleol hefyd ystyried y canllawiau canlynol pan fyddant yn cynllunio gwasanaethau yn ystod y cyfnod yr amhariad hwn:

1. Dylai Awdurdodau Lleol ddefnyddio'r cyfryngau cymdeithasol i gyfleu negeseuon a sicrhau bod cymorth ar gael yn eu cymunedau. Gallai hynny fod ar ffurf rhith grwpiau ar blatfformau'r cyfryngau cymdeithasol, fel Facebook neu WhatsApp.
2. Dylai cymorth a chyngor gael eu darparu'n ddigidol drwy gynghorion a ffeithluniau.
3. Dylai Awdurdodau Lleol ddarparu cymorth un-i-un, yn unol â'r canllawiau presennol ar gadw pellter cymdeithasol a hylendid, yn ogystal â gwneud y defnydd gorau o dechnoleg gwybodaeth a thechnolegau digidol wrth ddarparu gwasanaethau.

Nid yw'r rhestr uchod yn holl gynhwysfawr, gan ein bod yn cydnabod y gallai fod gan Awdurdodau Lleol dulliau a syniadau eraill y maent yn eu hystyried. Gofynnwn eich bod yn rhoi gwybod y diweddaraf i Lywodraeth Cymru am y gwahanol fathau o ddarpariaeth sydd ar waith.

## Gofal Plant Dechrau'n Deg

### **Cefndir**

Ar 20 Mawrth cyhoeddodd Llywodraeth Cymru [gyngor](#) yn ymwneud â'r cyfyngiadau mewn perthynas â darparu gwasanaethau ar draws y sector gofal plant yn dilyn y cyhoeddiadau cynharach a wnaed o ran cau ysgolion. Yn anad dim, lleoliadau gofal plant yw lleoliadau Dechrau'n Deg, ac felly dylid cyfeirio at gyngor ar Ofal Plant a'i roi ar waith wrth ddarparu gwasanaethau Dechrau'n Deg.

Cyflwynodd Llywodraeth Cymru Gynllun Cymorth Gofal Plant y Coronafeirws ar [6 Ebrill](#). Bwriedir i'r cynllun gynnig lleoedd gofal plant a ariennir i [blant](#) cyn oed ysgol y gweithwyr hanfodol a'r rheini sydd wedi'u diffinio gan y Llywodraeth yn agored i niwed.

Yn ei ddatganiad ar 19 Mehefin, dywedodd y Prif Weinidog mai'r bwriad oedd i wasanaethau gofal plant a chynlluniau chwarae ehangu eu gweithrediadau o 22 Mehefin ymlaen, fel rhan o adolygiad diweddaraf Llywodraeth Cymru o'r cyfyngiadau ar symud. Mae'r cyhoeddiad hwn yn arwydd bod y cyfyngiadau presennol ar bresenoldeb mewn ysgolion a lleoliadau gofal plant yn dod i ben, gan alluogi gwasanaethau i gynyddu eu darpariaeth i amrywiaeth ehangach o blant ar ôl cyfnod o amharu sylweddol ar eu gwasanaethau.

Cytunodd y Dirprwy Weinidog Iechyd a Gwasanaethau Cymdeithasol y dylai darparwyr Dechrau'n Deg ddechrau ar y broses o gynyddu eu darpariaethau o 22 Mehefin ymlaen yn unol â'r sector gofal plant ehangach. Yn ymarferol, mae hyn yn golygu bod yr holl blant 2-3 oed sy'n byw mewn ardaloedd Dechrau'n Deg, ac sy'n gymwys i gael cymorth, bellach yn medru cael cynnig gwasanaethau gofal plant Dechrau'n Deg, yn unol â'r trefniadau blaenorol ar gyfer y ddarpariaeth.

Er mwyn helpu i hwyluso mwy o bresenoldeb mewn lleoliadau gofal plant, gan gynnwys gofal plant Dechrau'n Deg, mae Llywodraeth Cymru wedi cyhoeddi

canllawiau [Mesurau Diogelu mewn Lleoliadau Gofal Plant: cadw gofal plant yn ddiogel](#) sy'n rhoi cyngor ac arweiniad i ddarparwyr gofal plant ynghylch sut i baratoi lleoliadau ar gyfer presenoldeb uwch gan barhau i ddiogelu plant a staff. Mae'r ddogfen yn gosod pwyslais ar asesiadau risg unigol a phrosesau effeithiol ar gyfer rheoli hylendid er mwyn sicrhau arferion diogel mewn lleoliadau gofal plant.

Yn unol â'r sector gofal plant ehangach, mae gofyn i holl ddarparwyr gwasanaethau gofal plant Dechrau'n Deg lynu at y canllawiau hyn wrth gynllunio a darparu gwasanaethau Dechrau'n Deg, hyd nes y clywir yn wahanol.

## **Disgwyliadau o ran y Gwasanaethau**

Ar 5 Awst 2020, cyhoeddodd Llywodraeth Cymru fesurau diogelu diwygiedig ar gyfer lleoliadau gofal plant, sydd, ynghyd â nifer o ddiwygiadau eraill, yn cydnabod mor anymarferol yw hi i blant bach iawn gadw pellter cymdeithasol, ac yn cael gwared ar y cyfyngiad i gadw grwpiau i 8 plentyn mewn lleoliadau gofal plant.

Dylai timau Dechrau'n Deg ymgyswrtio â'r canllawiau diwygiedig a gyhoeddwyd ar gyfer y sector, a dylent eu dilyn wrth ddarparu gwasanaethau gofal plant Dechrau'n Deg ar unwaith. Rydym yn rhagweld y bydd cael gwared ar y cyfyngiadau o ran niferoedd mewn lleoliadau gofal plant, a amlinellir yn y fersiwn ddiwygiedig o'r canllawiau, yn hwyluso'r ffordd i ailgorgo y gwasanaethau yn llawer llawnach o fis Medi ymlaen, a dylent ddychwelyd i'r lefelau arferol, neu'n agos at hynny, mewn cyfran helaeth o leoliadau Dechrau'n Deg.

Mae diogelwch plant a staff yn dal i fod o'r pwys mwyaf, a disgwylir i bob lleoliad gynnal asesiadau risg unigol i sicrhau bod unrhyw gynnydd yn y ddarpariaeth yn ddiogel ac yn parhau i gydymffurfio â'r canllawiau.

Sylwch mai ein dyhead o hyd yw cefnogi cynifer o blant â phosib o fewn canllawiau [Mesurau Diogelu mewn Lleoliadau Gofal Plant: cadw gofal plant yn ddiogel](#), felly os bydd modd ailgychwyn holl ddarpariaeth Dechrau'n Deg yn ddiogel o fewn y canllawiau hyn, dylai Awdurdodau Lleol geisio sicrhau darpariaeth lawn cyn gynted â phosib. Os nad oes modd i blant fod yn bresennol am ran o'r wythnos yn sgil mesurau lleol i reoli niferoedd, dylid cefnogi eu datblygiad drwy ffyrdd eraill, hynny yw adnoddau a gweithgareddau i'w cyflawni gartref.

Mae'r ymateb cenedlaethol i'r holl amharu a achoswyd gan COVID-19 wedi dangos i ni bod modd dod o hyd i ffyrdd arloesol o barhau i gadw mewn cysylltiad â phlant y tu allan i leoliadau gofal plant ffurfiol, ac rydym yn ddiolchgar iawn am holl ymdrechion y timau Dechrau'n Deg hyd yma. Gan ystyried effaith debygol y mesurau parhaus i gyfyngu ar symudiadau ar rai o deuluoedd Dechrau'n Deg, a'r amharu ar wasanaethau hyd yma, mae'n hanfodol ymdrechu gymaint â phosibl i gysylltu â theuluoedd Dechrau'n Deg dros wyliu'r haf.

Felly rydym yn gofyn i dimau Dechrau'n Deg wneud popeth o fewn eu gallu i gysylltu â phlant dros wyliu'r haf er mwyn eu helpu i baratoi i ddychwelyd ym mis Medi 2020. Mae'r canllawiau sydd eisoes yn bodoli ar gyfer y rhaglen yn dweud bod angen cynnig 15 o sesiynau gofal plant neu chwarae i deuluoedd a phlant dros y gwyliau, ac mae'n bwysicach nag erioed sicrhau bod y sesiynau yn cael eu cynnig i helpu teuluoedd dros yr haf eleni, os yw'n ymarferol ac yn ddiogel gwneud hynny.

Dylai Awdurdodau Lleol sicrhau bod prosesau yn eu lle i'w galluogi i gadw mewn cysylltiad â'r holl blant agored i niwed yn wythnosol, gan ddefnyddio staff gofal plant neu weithlu ehangach Dechrau'n Deg, dros gyfnod y gwyliau.

Rydym yn cydnabod efallai na fydd yn bosibl cadw mewn cysylltiad drwy'r dulliau traddodiadol eleni yn sgil y gofynion ar gadw pellter cymdeithasol a hylendid, a'r Awdurdodau Lleol eu hunain fydd yn penderfynu ar y ffordd orau o wneud hyn drwy gyfuno cysylltiad ffurfiol a pharhau i ddefnyddio'r dulliau arloesol a ddefnyddiwyd hyd yma. Gallai'r dulliau hynny gynnwys, ymysg eraill, dosbarthu adnoddau a gweithgareddau, a rhith-gysylltiadau dros y ffôn neu gyfryngau cymdeithasol.

## **Cyllid**

Rhodddwyd hyblygrwydd i Awdurdodau Lleol wyro oddi wrth eu cynlluniau cyflawni a hawlio ar gyfer gwasanaethau gofal plant Dechrau'n Deg o'r Grant Plant a Chymunedau yn seiliedig ar gostau disgwylidig hyd at 30 Mehefin yn y lle cyntaf, fel rhan o'r cytundeb a osodwyd ar gyfer gwasanaethau dan y grant.

Gan gydnabod bod Covid-19 yn amharu o hyd ar ddarpariaeth gwasanaethau, mae'r hyblygrwydd gyda'r grant wedi cael ei ehangu hyd at 30 Medi 2020. Mae'r cytundeb hwn yn galluogi Awdurdodau Lleol i barhau i ariannu gofal plant Dechrau'n Deg yn seiliedig ar gostau disgwylidig, sy'n hanfodol er mwyn cynyddu gwasanaethau yn raddol a helpu darparwyr a fydd yn gorfod darparu gwasanaethau llawnach yn yr hydref a thu hwnt.

Er mwyn parhau i elwa ar yr hyblygrwydd hwn, bydd angen i Awdurdodau Lleol ddangos eu bod yn cynllunio i sicrhau bod modd i wasanaethau gofal plant Dechrau'n Deg ailgychwyn yn llawn ddechrau tymor yr hydref, er bod y gwasanaethau 'llawn' yn debygol o gael eu cyfyngu yn unol â'r mesurau diogelu sydd yn eu lle ar gyfer y sector.

Cyfeiriwch at ganllawiau COVID-19 y Grant Plant a Chymunedau i gael rhagor o wybodaeth ynghylch trefniadau talu am wasanaethau gofal plant Dechrau'n Deg.

## Lleferydd, Iaith a Chyfathrebu a Dechrau'n Deg

O ystyried y cyngor gwyddonol presennol sy'n ymwneud â phwysigrwydd cadw pellter cymdeithasol, bydd rhaid i'r Awdurdodau Lleol addasu'r ffordd y mae gwasanaethau lleferydd, iaith a chyfathrebu rhaglen Dechrau'n Deg yn cael eu darparu. Rydym yn cydnabod na all y gwasanaethau hynny gael eu cyflawni yn y modd traddodiadol, ac rydym yn annog ffordd ymarferol a hyblyg o ddarparu gwasanaethau o bell / yn rhithiol. Darllenwch y cyngor yn atodiad 1 ynghylch rhoi cymorth wyneb yn wyneb.

Dylai Gweithwyr Proffesiynol Perthynol i lechyd bennu pa waith sy'n flaenoriaeth ac yn waith brys, a'i drefnu'n haenau gan nodi'r risgiau. Dylai gweithwyr proffesiynol ddilyn y Canllawiau a'r cymorth diweddaraf gan Lywodraeth Cymru, lechyd

Cyhoeddus Cymru a'u cyrff proffesiynol. Bydd yr holl ganllawiau ychwanegol yn cael eu rhoi ar dudalennau cyngor Llywodraeth Cymru ar COVID-19.<sup>2</sup>

Yn benodol, mae canllawiau adsefydlu:

<https://llyw.cymru/fframwaith-adsefydlu-gwasanaethau-iechyd-chymdeithasol-2020-i-2021-0>

Mae cyngor ychwanegol hefyd ar Hyb Cyngor HCPC:

<https://www.hcpc-uk.org/covid-19/>.

### **Canllawiau ar gyfer Gwasanaethau Teuluoedd yn Gyntaf**

Mae'r canllawiau hyn yn egluro pa wasanaethau a ddylai gael eu darparu a'r modd y dylent gael eu darparu ar lefel leol.

Rydym yn cydnabod ei bod yn afresymol i barhau i weithredu rhaglen Teuluoedd yn Gyntaf fel ag y mae ar hyn o bryd o dan yr amgylchiadau presennol. Hyd nes y rhoddir gwybod yn wahanol, dylai'r Awdurdodau Lleol weithredu yn unol â'r egwyddorion canlynol:

1. Darparu gwasanaethau Teuluoedd yn Gyntaf mewn modd sy'n gyson â'r canllawiau ar gyfer cadw pellter cymdeithasol sydd wedi'u cyhoeddi gan y Llywodraeth<sup>3</sup>.
2. Bydd angen i wasanaethau Teuluoedd yn Gyntaf ddefnyddio'u barn broffesiynol i nodi pa wasanaethau sy'n parhau i fod yn flaenoriaeth i deuluoedd a sut y gallant gael eu darparu yn eu hardaloedd lleol yn ystod y cyfnod hwn.
3. Mae hynny'n debygol o olygu y bydd yr Awdurdodau Lleol yn cynnig nifer mwy o wasanaethau dros y ffôn, drwy'r cyfryngau cymdeithasol ac ar-lein.
4. Bydd angen barn broffesiynol gweithwyr gwasanaethau Teuluoedd yn Gyntaf hefyd i wybod sut i gefnogi grwpiau mewn perygl ac sy'n agored i niwed (fel y rheini sydd ag anghenion diogelu a/neu blant a phobl anabl a/neu eu teuluoedd). Bydd angen i weithwyr gwasanaethau Teuluoedd yn Gyntaf drafod y cymorth sydd ar gael i'r teuluoedd hynny ag uwch-reolwyr ac â gweithwyr gwasanaethau eraill yn ardaloedd eu hawdurdodau lleol.
5. Wrth i ysgolion gynyddu eu gweithrediadau, bydd angen i wasanaethau Dechrau'n Deg sicrhau fod ganddynt brosesau atgyfeirio a blaenoriaethu cadarn yn eu lle i sicrhau bod teuluoedd yn cael cynnig cymorth priodol cyn

---

<sup>2</sup> <https://llyw.cymru/topic/980/latest>

<sup>3</sup> <https://llyw.cymru/coronafeirws-cadw-pellter-cymdeithasol>

gynted a phosib.

6. Dylai gwasanaethau Teuluoedd yn Gyntaf ystyried anghenion teuluoedd dros wyliau'r haf ac edrych ar ffyrdd o gynnig cyfleoedd chwarae a gofal plant i gynifer o blant â phosib, yn unol â'r canllawiau diweddaraf ar ddiogelwch COVID-19.

Er y bydd y gweithgarwch yn erbyn eich cynllun cyflenwi y cytunwyd arno yn newid, dylid casglu'r data ar gyfer y gwasanaethau a ddarperir o hyd.

### **Monitro ac Ariannu Teuluoedd yn Gyntaf a Dechrau'n Deg**

Er y bydd y gweithgarwch yn erbyn cynllun cyflenwi'r Grant Plant a Chymunedau y cytunwyd arno yn newid, dylid casglu'r data ar gyfer y gwasanaethau a ddarperir o hyd.

Ym Mlwyddyn Ariannol 2020-21, ni fydd angen yr Adroddiadau Cynnydd a Hawliadau Ariannol cyntaf ar gyfer y Grant Plant a Chymunedau tan fis Hydref 2020.